

# Tiradurs grischuns fan onur a Benedetg Fontana

Gion Nutegn Stgier/FMR

**Ils tiradurs grischuns han sajettà precis sin la distanza da 300 meters tar la 59avla ediziun dal Tir Chalavaina a Müstair. Er cun la pistola sin la distanza da 50 meters han els persvadì. Tratg il tir istoric han 324 tiradurs e tiraduras e 54 gruppas.**

Il Tir Chalavaina è dals 19 tirs istorics da la Svizra l'unic che ha lieu en il Grischun. L'emprima giada ha quel gi lieu il 1927. El commemorescha la guerra da la Chalavaina, nua che las Trais Lias sut Benedetg Fontana han battì l'onn 1499 ils Austriacs sut retg Maximilian I. Mintg'onn n'ha lura il tir istoric betg gi lieu, quai durant ils onns da la Segunda Guerra mundiala. Plirs onns è vegnì sajettà quel tir en roda er a Cuira, Glion, Tavau e Samedan. Dapi il 2014 ha il Tir Chalavaina lieu alternativmain a Tavau ed a Müstair.

Ils onns 2020 e 2021 n'ha el lura betg gi lieu pervia da corona e l'onn 2022 pervia dal Fourm mundial d'economia ch'è stà en il mais da matg a Tavau. Ussa, sonda passada, èn 324 tiradurs e tiraduras da l'entira Svizra stads annunziads per il 59avel tir istoric a Müstair. L'organisaziun dals Jauers, cun Daniel Clavadetscher, il president dal comité d'organisaziun, è stada en tutt'as modas e manieras exemplarica. President dal cussegl da Chalavaina è Andrea Stiffler, il matscheur da Tavau.

Menziunà saja ch'il Tir Chalavaina vegn be tratg cun armas da militar e betg cun armas da sport. Sin la distanza da 300 meters vegnan tratgs 12 sajets sin la schiba B4 cun validaziun da diesch. Quai vul dir ch'il resultat maximal munta a 120 puncts.

## Nagina surpraisa

Exemplaric han lura er tratg ils tiradurs e las tiraduras dal Grischun en la concorrenza singula da 300 meters. Cun la victoria da Thomas Caviezel, il segund post da Carl Frischknecht, l'antierur president da l'Uniun da tir chantunala, ed il terz plaz da Mario Davaz hai gist dà in traidubel success grischun. La dominanza grischuna sin quella distanza sa mussa anc pli cler cun consultar la rangaziun. Tranter ils 14 megliers tiradurs sa chattan be participants e participantas dal Grischun. Nagina surpraisa n'è lura la victoria da la grupp da Rothenbrunnen/Giuvaulta en la concorrenza da gruppas. Pliras giadas è quella grupp stada campiunessa grischuna e campiunessa svizra.



Victoria per la grupp da Rothenbrunnen/Giuvaulta cun participaziun surmirana. (da san.) Jon Domenic Parolini, cusseglier guvernativ, Rony Frank, Silvia Plaz, Primus Egle, Franz Plaz, Carl Frischknecht, Thomas Caviezel, Tarsizius Caviezel, president dal cussegl grond. Foto Gion Nutegn Stgier

Per in onn resta ussa la standarta desiderada dal Tir Chalavaina en la Tumblestga. Cumplettà il podest tar las gruppas han lura las gruppas da Tavau e da Müstair. Liestal è la grupp victura tar la concorrenza da gruppas pistola 50 meters. Sin il podest sa chattan lura cun Cuira e Küblis er duas gruppas grischunas. Il victur da la concorrenza singula tar las pistolas deriva dal Partenz e sa numna Andreas Walli.

## Dapi il 15avel tschientaner gronda tradiziun

La muntada dal Tir Chalavaina conferma er la gronda preschientscha da la prominenza politica naziunala, chantunala e regiunala en la Val Müstair. Preschent era cusseglier dals chantuns Stefan Engler e las dus cusseglieras naziunalas Anna Giacometti e Mgdalena Martullo-Blocher. Tarsizius Caviezel, il president dal Cussegl grond, era er tranter ils giasts d'onur ed er cusseglier guvernativ Jon Domenic Parolini è vegnì en la Val Müstair.

Deputà Rico Lamprecht è er stà da la partida e sa drizzada a la raspada è cun bels plects Gabriella Binkert Bechetti, la presidenta da la vischnanca Müstair. Jon Domenic Parolini ha cunzunt menziunà l'impurtanza da las festas da tir per la cuminanza, la cumpagnia, per l'aspect social, per la prestaziun sportiva e per la muntada da las uniuns. Dapi il 15avel tschientaner haja il tir gronda tradiziun en Svizra, ha punctuà il cusseglier guvernativ da Scuol. L'armada saja er ferm dependenta da

la lavur che las uniuns da tir prestan ed er en quella chaussa meritan ellas respect.

## Resultats singuls 300 meters

1. Thomas Caviezel, Rothenbrunnen/Giuvaulta, 116 puncts, 2. Carl Frischknecht, Tume-gl, 114, 3. Mario Davaz, Sent, 114, 4. Roman Neuschwander, Tschlin, 113, 5. Robert Studer, Castrisch, 112, 6. Giusep Cadruvi, Ruschein, 112, 7. Alessandro Rousette, St. Maria, 112, 8. Bruno Tscharner, Schiers/Asschera, 112, 9. Silvia Plaz, Rothenbrunnen/Giuvaulta, 111, 10. Simona Tarnutzer, Schiers/Aschera, 110.

## Resultats gruppas 300 meters

1. Rothenbrunnen/Giuvaulta, 6565 puncts, 2. Tavau, 640, 3. Val Müstair, 634, 4. Schiers/Aschera, 627, 5. Ruschein, 627, 6. St. Maria I, 626, 7. Beinwil, 621, St. Maria II, 598, 9. Lenzburg, 594, 10. Versomi, 589.

## Rangaziun singula 50 meters pistola

1. Andreas Walli, Küblis, 111 puncts, 2. Markus Aebischer, Liestal, 111, 3. Dumeng Fallet, Müstair, 4. Adrian Ambauen, Samedan, 5. Daniel Clavadetscher, Müstair, 6. Stephan Lehmann, Cuira, 109, 7. Leo Dumoulin, Cuira, 109, 8. Klaus Kruse, Tavau, 109.

## Rangaziun gruppas 50 meters pistola

1. Liestal, 632 puncts, 2. Cuira, 632, 3. Küblis, 622, 4. Müstair, 616, 5. Zunkzen Tenniken, 602, 6. Samedan, 589.